

دلے طرح وجع



دلع طرح وجمع

أشعار: وليد زهير

عدد الصفحات: 88

الطبعة الأولى

1438 هـ - 2017 م

جميع حقوق الطبع محفوظة للمؤلف

رقم الإيداع بدار الكتب المصرية: 15762 / 2017

ISBN: 978-977-6580-99-2

رئيس مجلس الإدارة

أسامة إبراهيم

المدير التنفيذي

سماح الجمال

إشراف فني

أحمد جابر

تصميم الغلاف

أحمد صادق

التصميم الداخلي

محمد عبدالفتاح

دار النخبة

33 شارع السنترال - الحي الأول -

مدينة الشيخ زايد - الجيزة - مصر

تليفون: 00202 - 38511969

002 - 01288688875

E-mail: alnokhoba@gmail.com

دلے طرح وجے

أشعار

ولید زهیر

الإهداء

اللى عنده لقاء وساندى
عنده حظ من الحياة
دول أكيد أغلى ما عندى
ف حبي ليهم عقلى تاه

وليد زهير

نورتى كوكبى

أنا فى الهوى عاشق مذهبى
وحروف كلامى شراعى ومركبى
لما اتولدت لمست النجوم
وفنون الهوى وطنى وملعبى
وبنيت لقلبى قصر عالى
مليان زخارف وسلم لولبى
وقعدت ع العرش سلطان زمانى
قاضى الهوى شغلى ومنصبى
وجلعت القمر صديقى الوفى
وقلوب العذارى ف درج مكتبى
للحب عندى مليون شيطان

ورسول الهوى قائد موكبى

مركب هوايا من غير شراع

ولو عشقتى لازم تركبى

اصل الهوى عندى بجنون

وكاس هوايا هتيجى وتشربى

قلبك يعاند ويمكن يكابر

انده عليكى لا يمكن تهربى

انا الامير سلطانى باقى

وانتى الاميرة نورتى كوكبى



ارجوك بلاش

لو نسيت أنا لسه فاكرة
الهوى كان بينا فكرة
نعيش عليه نستنى بكرة
لا فيه فراق ولا دمع عين

** ** *

انا كنت أبص للقمر ..
ألاقيه حزين
أسال يقولى حبيب غدر ..
مسألش مين
كنت اقول ازاي يعيش
من غير حبيبه ولو ثوانى

وأقول لروحي متخافيش

احنا هو انا شكل تانى

تقول دا كانوا من يومين

ويا القمر كانوا سهرانين

** ** *

ولا كنت اصدق مستحيل

لو حتى جبتوا ١٠٠ دليل

وسط النهار يفاجئنا ليل

وتكون يا قلبى م المجروحين

** ** *

لو لسه ناوى ارجوك بلاش

دا اللى جراننا ميتنساش

وهاتلى قلب من بعد جرحه من تانى

عاش او حد عاشق رغم الأنين



خايقة اجيلك

السنة دى خايقة اجيلك يا بحر تانى

مع ان موجك وشطك عارفين مكانى

** ** *

فاكر يا بحر لما رسمت على الرمل قلب

وهب موجك حسيت كأنى عملت ذنب

** ** *

بين موج بيشطب ..

وموج يطبطب

وساعة شروقها .. ليه شمسى تغرب

** ** *

وقفت تايهة وجت خيالى كام الف فكرة

معقولة تقصد خايف عليا ان ابقى ذكرى
انا قولت يمكن القى ابتسامتك خوفتنى
لا عمرى جيتلك ولا اشتكيتلك وجرحتنى

** ** *

اسأل الرملة اللي منك
اللى ياما حكتنلى عنك

** ** *

كم قلب جالك جواه حكاية بتبتدى
يطلب نصيحة او كلمة بيها يهتدى
يا اما تسكت وتسيبه يرسم فرحته
يا اما تغضب وبكل قسوة بتعتدى

** ** *

مش غباوة بيرسموا رملة وموجة
وشمس غابت
بس الغباوة لما اجيلك واشتكيلك

وبرضه ساكت

** ** *

ما تقول يا بحر انا ذنبي ايه لما رسمت
قربت منك وجيت لعندك والقاك بعدت

** ** *

اياك فاكرنى من البنات اللى انت هديت رسمهم
او من اللى احلامهم آمنوك عليها وبددت حلمهم

** ** *

لا يا بحر كل الحكاية لقيتنى مخدوعة فيك
زى كل البنات فاكرة لما تشتكيلك هتلاقك

** ** *

اوعدك هرسم ضحكتى

فوق كل نجمة فى السما

وان يوم جرحنى هكتم دمعتى

تسأل عليا يقولوك مغرمه

بعت عمرى

انا بعت عمرى
وكان رسولى الهوى
كتبت ١٠٠ قصيدة
ولا جانى يوم ردك
معلش يا حب النوبادى ..
خليك معايا المرادى ..
اسألها ليه بس الجفا ..
وليه مصره على بعادى
معلش يا حب النوبادى ...
قولها ان فيه واحد برئ ..
وانتى بالنسباله كل شئ ..

بس تاه منه الطريق ...
قولها انه راسم صورتك جوا عينه
خد لنفسه كل الاهات ..
ووهبك انتى فرحة سنينه ...
ورسم رموشك عشه ومكانه
ودوب آهاته العشق وحنينه ...
مستنى ايه يا حب روحلها ..
اوصف غرامى وبصدق قولها
انى دايب من نار هواها
وابيع حياتى فدا ثانية بقربها ...



أسف غلطت

بعد اللي قولته عن حبي ليك

أسف غلطت

تبيع فى قلبى ويشترىك

خلاص تعبت

ابعد بغدرك عن حياتى

وكفاية جرح

وسينى وحدى اعيش آهاتى

واتمنى فرح

مبقاش فى حاجة جوا منى تنفعلك

قلبي خلاص مش حتى عاوز يسمعك

** ** *

حييتك وكنت بضحي

اتألم واداري في جرحي

واستنى تقولى اسامحك

ألاقيك للألام بتصحى

** ** *

القلب اللي حبك مات

وكلامه دموع وآهات

صدقنى زمانك ولى

كان ماضى وعدى وفات



يوم القمر

فكر فى يوم القمر

يا حبيبى يوصفك

احترار وداب م السهر

مش لاقى وصف ينصفك

ولمين هيشكى ..

ولمين هيحكى

دى حروف الكلام ..

جميعها بتعشقك

انا كنت انادى ع الهوى ..

بعلو صوتى

واقوله دايب يا هوى ..

ما ترحم سكوتى
وفى يوم مكنش باختيارى
جمعت افكارى
وقولت اكتبك كلمتين ..
هما كلمتين ...
بحبك .. وحشتينى ..
طب بلاش اكتب كلمتين
قولت ارسم وردتين
وردة للشوق والهوى
ووردة لحنين السنين
القلم مش راضى يطاوعنى
والورق مليون تمنى
والسطور بترقص تغنى
وقلبي خايف لا الهوى

يكون سامعنى

هو انتى مش عارفة

ان الهوى بيغير عليكى

دا انا جيت فى مرة اوصفك

واوصف عنيكى

لقت حروفى ملخبطة

وقلمى كأنه عبد ليكى

القلم مش بيكتب كلامى ... بيكتب كلامه هو

ومش بيوصف غرامى ... بيوصف غرامه هو

فقلت اكتب بحبك ... لانى عاجز اوصفك

مهما كتبت



بصت عيونہ

بصت عيونہ جوا عینی

كان مفارق بقاله فترة

قبل ما يطلب یجینی

جت خیالی ألف فكرة

** ** *

یا ترى ایه الحکایه

حن قلبه لقلبی جانی

ولا كانت دی النهایه

مش هبص ف عینه تانی

** ** *

سهرت لیلی ف شوق وحیره

اول ما اشوفه هقوله ايه

كلام عتاب ودموع كتيرة

عمالة تيجي ف بالي ليه

** ** *

حضنت ايدہ همس وقالی

بعدي عنك يعني موت

كل كلام قلبه وصلی

وكل دقة كان ليها صوت

** ** *

نسيت عتابي غمضت عيني

وألف دمهه كانت ف عينه

انا كنت فاكر انه نسيني

والحب مات بيني وبينه



سجن الاهات

السجن كاس ولازم نشربوا

انا اقصد سجن الاهات

لكل واحد جربو

** ** *

انك تكون مجبوس ضلوعك

وتيجى تحكى تنزل دموعك

والحب وعذابه منك يهربوا

السجن كاس ولازم نشربوا

** ** *

يا صبر عملنى

ازاى اقدر اكون

فى الصبر ايوب

وازای آهاتی تهون
ع الصبر مش قادر
والجرح مش فاكر
غير بس قلبی بیتعبوا
السجن كاس ولازم نشربوا

** ** *

خضرة ومية ولیل
والقلب برضه علیل
تایه فی وسط نجوم
مش لاقى حتى دلیل
حتى اللى قلبه معاه
بقى ذكرى عاش جواه
عایشین بیتعذبوا
السجن كاس ولازم نشربو



قلمى

مسكت قلمى اكتبه اسمك

كتبه لوحده ورسملى قلبك

وجنب اسمك كتب بجنبك

سأته قالى وانت مالك

** ** *

عاوز اكتب كلام كتير

وارسم عيونها وارسم اسير

وارسم رموشها خيوط حرير

هرسم كمان فرحة وصالك

** ** *

هرسمها وردة فى الصبح بدرى

ونقطة ندى على غصن تجرى

واكتب حروفها بخط وردى

صدقنى عمرى ما اخون خيالك

** ** *

هرسم سما وارسمها نجمة

خدودها نورك ف ليلة عتمة

وجودها ف حياتك م المولى حكمة

من اول وجودك دى مكتوبالك

** ** *

هرسمنى طير حر ف سماها

واسكن عيونها واعشق هواها

واتمنى انول لحظة رضاها

ونفسى ثانية اكون بدالك



أحلامي

حلمت بحلم مش فاكر
وانا نايم حلمت بايه
حاولت يا صاحبي مش قادر
ولو فاكره يفيدنى فى ايه
ما ياما حلمت من صغرى
وحلمى فى نومى صحانى
كبرت وهمى كسر ضهرى
وفجأة بقيت واحد تانى
وبسهر ليلى مبنمشى
بخاف الحلم يوجعنى
يجيلى النوم اقوله امشى
ومين يا ليل هيسمعنى

موج البحر

البحر موجه هز القلوع
والشمس غابت رافضة الرجوع
والقلب حاله فى الهوى
مع كل دقة تنزل دموع مركبة
وضلت طريقها وسط بحر الحياه
مش لاقية قبطان يسوقها
ولا شط تبقى فى حماه
موج على هز شراعها
وموج كثير جاى من وراه
ورغم كل الظروف
مقاتلش ولا حتى اه
ورغم الوجع كتبت حروف
عشق ما تعرف مداه

اسمعنى يا زمانى

يا حاسد بص حواليا
عد جراحى بس ف يوم
وبرسم ضحكة مش ليا
وبعد الضحكة تل هموم

** ** *

وحتى الفرح ليه مغشوش
وليه على بعض مش بنخاف
وشوش كدابة لابسة وشوش
وياما القلب منهم شاف

** ** *

ارجوك يارب صبرنى ع اللى منى

وفاتونى قليل الأصل وكسرنى

وخان القلب وعيونى

** ** *

يا دنيا حبيبي ليه باعنى

وعدى الشط من غيرى

وانادى كأنه ما سامعنى

كأنه ما كان فى يوم طيرى

** ** *

ياريت تسمعنى يا زمانى

وخذ بايديا لو ثانية

ساعدنى اكون واحد تانى

وينشف دمعى فى عنيا



اكتب انت النهاية

لا السنين قدرت ف يوم تبعدنى عنك

ولا الحنين وعتاب ولوم قربنى منك

والقمر سهران ليلاتى من غرامى

وحبى فيك

والسهر يسمع آهاتى يبعث عتابه

حبيبى ليك

** ** *

اجرح وفارق مستنى ايه

ويا قلبى اوعى تبكى عليه

خلاص دى هانت عليه دموعك

ولا عدت ساكن حتى ف عنيه

انا قلبى ياما استنى منك .. تروح تغيب
لا عتابه ليك ولا بعده عنك .. يفرق كثير
بلاش تقول أصل الحكاية .. قسمة ونصيب
واكتب بايدك انت النهاية .. بس بضمير

** ** *

اصل الكلام زى الملام
لو قلب مات
تفرق فايه لو حس ييه
ما الوقت فات
بالعكس ممكن تزيد جراحه وهموم هواه
كل اللى قبله للحب راحوا بقوا ذكريات



بخاف من الليل

بيقولولى انساك

وانسى كل هواك

تعب الهوى قلبى

وماخذش الا قساك

** ** *

واقول لقلبى توب

يقول هواه مكتوب

لو حتى مش جنبى

انا برضه دايب دوب

** ** *

مستننى قال قلبى

قلبك يحس بحبى

وعيونى دايمآ تحكى

ودموعى سبقت ضحكى

ايه بس كان ذنبى

** ** *

وبقيت بخاف م الليل

بقاسى وحدى الويل

ياما كتير عاشقين

سهرو ودابو حنين

وانا قلبى لسه عليل

** ** *

ابعد يا حب بعيد

وبلاش تقول مواعيد

مبقتش حمل وعود

او حلم مش موجود

عمال فى جرحى تزيد

قلب خاين

ليه بتنكرى حب عايشة لسه فيه
وليه بتغدرى فاكرة جرحك هتداويه
حتى صوتك وف سكوتك دول معاه
كام قلب غيرى عشان تداوى بتجرحيه

** ** *

بتعوضى نقص .. وتجرحى قلبى .. وتغدرى بيا
ولا قلبك حس .. فى مرة بحبى .. كدبتى عليا

** ** *

الحب عندك كان مظاهر
مش بقلبك بتعيشيه
وانا اللى قلبى قلب طاهر

صدق هواكى لعبتى بيه

** ** *

عيشتى قلبى فى مسرحية

وكان بطلها قلب خاين

مثلتى طبعا دور ضحية

ودورى حتى مكنش باين



قدرك كده

لسه ناوى تحب تانى ...
ولسه جواك نفس الحنين ..
هتروح لقلب .. يخدعك .. يجرحك
وبعد سنين .. تقول جرحنى ورمانى ..

** ** *

لسه ناوى تحب تانى ...
مش كل عين تندهك ..
تسمع نداها ...
وبكلمة حلوة تطمئك ..
تموت فداها ..
وتقول خلاص لقيت مكانى ...
لسه ناوى تحب تانى ...
الحب مش مكتبولك .. قدرك كده

زى وردة قتلها غرامها .. وشوق للندى
قدرك كده .
مش كنت بتقول المرة اللي فاتت ..
انك عاشقها ..
وان شوقك هو شوقها ...
اياك تكون نسيت لوعة فراقها ..
دا انا لسه فاكر ..
لما كنت تحكم ع الليل يسهر معاك ..
وتشكى للنجوم نجمة .. نجمة
لحد ما تدوب النجوم ..
والقمر يعشق هواك
انا مش هقولك تانى ع الحب والامه
لان شوقك اكبر م العشق وغرامه حبها ..
ان كنت عارف انها ..
تقدر تصون حبها ..
وانك هتسكن قلبها ..
مش حد تانى ...

لسه ناوى تحب تانى ...
وان جيت ف يوم تشكى صدها
ونار هواك والى آهه ف بعدها
هقولك الحب مش نظرة وامانى الحب ..
انى اعيش عشانك وتعيش عشانى ..
وقبل قلبى ما يندهك ..
قلبك بيكون نادانى ...
انت لسه ناوى تحب تانى ...
الحب انك تتوه ...
لما تشوف عيون حبيبك
ومهما حاولوا يجرحوه ..
تكون نصيبه ويكون نصيبك ..
ومفيش فيكوا حد يكون انانى ...
ولآخر مرة هسالك ..
انت لسه ناوى تحب تانى



مظلوم

مظلوم فى وسط العاشقين

السهرانيين والمجروحين

طب هما الجرح قبله الفرح

ووقت الشرح قلوب تايهين

** ** *

خدعونى قالوا كن برىء

وانا من غبائى صدقت قولهم

ومشيت فى حالى فى الطريق

يمكن ينولنى اللى نالهم

اشوف وجوه شبه البشر

بس القلوب زى الحجر

اقول دا يمكن مظلومين

** ** *

انا كنت فاكر لما اشوفك

هنسى اللى كان

حسيت بخوفك جوا جوفك

محتاج امان

والليل سواده بضحتك

بقى فجر نور

والروح مناها صحبتك

والشوق بحور

ولقيتني عايش جوا حلم

معرفش حتى حدوده فين

** ** *

دقت طبول وطبول

مين الضحية؟؟

انا قولت مش معقول

تبعينى وف ثانية

اتارى قسمة وقدر

سالت حتى القمر

قام قالى طبع البشر

حتى اسال العاشقين



حکمت بايه...؟

في السكة تاهت كل الخطاوى

وقلوب كثير بتقول حكاوي

تجمع وتقسم ..

تطرح وترسم

ايه النتيجة بعد اليساوى

** ** *

هتروح وتعشق

وهواه تصدق

وعزول هيسبق

يسرق الحلم اللى كان مولود

تفضل تعافر

على البعد صابر

ويغيب يسافر

حلمك ويفضل بس حدود

** ** *

الحكم بعد المداولة

والجاني مش معلوم

والقاضي يعمل محاولة

السهم كان مسموم

والجرح بين الضلوع

والقلب بات موجوع

بيقول بصوت مسموع

فاضلى بس هموم

** ** *

حكمت قولى بايه

انساه وانسى عنيه

وان زار خيالى اجافيه

الحكم مش معلوم

تمن الخيانة كام

والكذب والاوهام

وضياع كتير احلام

قولى كلام مفهوم

** ** *

البحر موجه غويط

يلزمله قلب حويط

مش قلب لسه عبيط

كان نفسه يكون معشوق

والسهم علم فيه

كان فاكراه حب

اتاريه مخدوع برمش عنيه

وكواه لهيب الشوق



سايقة عليك الليل

سكنت جار القمر

يا حلو ونسيتنى

وانا دوبت سهد وسهر

تهجرنى ونفوتنى

سايقة عليك الليل

متسبش قلبى عليلى

والاقيق فى يوم جيتنى

** ** *

انا قلبى حبك

وبرغم صدك

او حتى بعدك

بشتاق كثير

حياتي مرة

طب حس مرة

لو حتى نظرة

ادوب واغير

** ** *

يا ناس عينيه

انا روى فيه

وهتعمل ايه

مشغول يا قلبى

طب ليه جفاك

بعدين معاك

دايبة ف هواك

ايه بس ذنبى

يا قلبه هدى

على قلبى عدى

بلاش تحدى

وتغيب وتنسى

قرب تعالى

انا حالتى حالة

اصل استحالة

لعيونك انسى

** ** *

خلاص يا قلبى

ابعد وخبى

عن قلبه حبى

يمكن يدوب

انساه يا ليلى

يقول يا ويلى

اوعى تقوليلى

عن حبه اتوب



آخر الحكاية

يا اللي انت دوبنا ف هواك

وأخذنا واديننا..

إيه آخر الحكاية معاك

على شط رسينا

وحياة من خلقك وسوى

وحياة عيونك الحلوة

لا عمر قبلك عشقنا..

ولا حتى حيننا.....



حبة فراولة

تولتني تولة
هعمل محاولة
وقلبي واسطة
قالتلى مالك
مش مرتحالك
ابعد خيالك عن عيني يا اسطى
** ** *

آه من غرامها
وحروف كلامها
حتى ف قوامها
يا ناس صاروخ
انا دوبت فيها
شدتني ليها
نظرة عينيها
خلتني ادوخ

يا حنة منى
على قلبى حنى
هفضل اغنى
لعيونك انتى
بس انتى شاطرة
فى الحب قادرة
خليكى فاكرة
قلبي ملكتى

** ** *

اللى فى جمالها
واللى فى دلالتها
انا قلبى قالها
فى الحب دايب
شغلت عنيا
مقدرش ثانية
اعيش يا دنيا
من غير حبايب



عصفور وساقية وشجرة توت

عصفور وساقية وشجرة توت

والساقية دايرة والساعات بتفوت

والغصن مايل

للعش شايل

عصفورنا هايل

ولا عمره كان هلفوت

عصفور وساقية وشجرة توت

** ** *

الفجر شقشق

عصفورنا زقزق

والشمس تشرق

تصبح وتمشى

طار فى الفضا

لابعد مدى

غنى وشدا

فرحان منمشى



نهاية حكايتي

انا المسجون فى احزاني
وتاه فى الدنيا عنوانى
ياريت لو مرة يا زمانى
تداوى الجرح ودموعى

** ** *

لقيتني لوحدي فى متاهه
قليل الاصل علاها
ودنيا الغدر جواها
بدمى تقيدى يا شموعى

** ** *

بقول الاله من قلبى
وليه يا عيونى بتهونى
تدارى الدمع وتخبى

ومهما يخونو بتصونى

** ** *

يا موج البحر عدينى

رمونى حبايى وفاتونى

وأقرب شط رسينى

بنادى وهما ما نادونى

** ** *

لو اعرف بس ليه آخر

خلاص ع الصبر مش قادر

وحتى القلب مش فاكر

سنين ياما وهو حزين

** ** *

كأن الوقت مش وقتى

ووقت كلامى كان صمتى

ما لاقى نهاية لحكايتى

حدود الآهه بس لفين

أسفة

أسفة لأنى غلظت فيك

غصب عنى وبايديك

انت اللى بادي بالمام

وحبى كله هان عليك

** ** *

الحب حاجة غير كدا

الحب نسمة زى روح

يوصل هواك ابعد مدى

وبكل حاجة العين تبوح

** ** *

علشان بحبك اتاسفتلك

وكتمت دمعى جوا عيني

طب قولى مرة احتاجتلك

وسمعت قلبك بينادينى

** ** *

لو كان فى قلبك م البداية

حب صادق مش كلام

طب ليه بتكتب ليه نهاية

وتخون هوايا ليه حرام



معلش آسف

قبل اما اشوفك مكنش ليا روح و قلب
ولا كنت بسهر ولا حتى افكر انى احب

** ** *

انا كنت عارفة مهما اتعاهدنا راح يجى وقت
تقولى فيه معلش آسف والقاك بعدت
ما هو اصل حال كل الاحبة اصبح كدا
بس المفجأة قلبى يلاقيك تانى رجعت

** ** *

اخذت ايه بس اما خنت
وكسبت ايه بعد اما بعث
انا م الخيانة خلاص شبعث

ومفیش دموع من تانى وعد

** ** *

شوفتك بعينى بتبص ليها

ولمحت صورتك جوه ف عنيتها

وتسيبنى واقفة وتجري عليها

وكأن اللى بينا هزار مش بجد

** ** *

بتحبنى ؟

كان سؤال انا قولته ليه

طبعا يا روحى دى الاجابة من عنيه

واخترت اعيش من غير هواه ولجرحى ادارى

ومهما اخبى عايشة وقلبي بيقتاسى نارى



عيون خاينة

خايف فى يوم افرح
والفرح مش ليا
بشوف عينيك اسرح
عشق العيون غية
وليه عينك تجرح
من بعد الملاغية
فى عيون ممكن تخون
من بعد كام ثانية
وعيون حبيها تصون
وتسكن عيونه هيا
فى قلوب ممكن تعيش
من غير هوا ومية

وقلوب كلامها مفيش

واخدة الحب تسلية

ان كنت ناوى الجواز

متقولشى دى غنية

تتحرق فلوسها بجاز

الرك ع التريبة

لو فاكرة السعادة ف مال

تبقى انتى ست غبية

دا القلب يوم لو مال

باقى الحاجات شكلية

** ** *

كبرتك على ايدى وتنسى

من غدرك مشبعتش لسه

علمت قلبى معاك حاجات

بقى يجرح لحيابيه ويقسى

حبيتك قررت تبعنى
وداويتك وانت بتوجعنى
علمتك ازاي تشتاق
كان قلبك ولا مرة سامعنى

** ** *

وانا ماشية بسبق خطوتى
واضحك بتنزل دمعتى
وكل ذكرى تزور خيالى
الاقينى نايهة فى سكتى

** ** *

وحياة كل دمعة فى عينى
ليذلك هواك وتجينى
تتمنى ان أقولك كلمة
أو نظرة يدوب من عينى



انا اختها

أنا أختها.. ايه ذنبها ..

يموت قلبها.. وتزيد جروحها

وصفت عينيك.. وغرامها بيك ..

تحكى عليك.. وناسية روحها.....

نزلت دموعى وقتها

والآهه منى كتمتها

وعاتبته نفسى ولومتها

أنا اختها

** ** *

بتحببنى .. عارفك برئ

وملكش ذنب .. فى اى شىء

بينك وبينى قلبها

ارجوك تحس بحبها

مش ممكن اقبل جرحها

انا اختها

** ** *

حاجة واحدة مصبرانى

ع اللى بيا واللى فيه

حتة منى تكون مكانى

صون هواها واشتريه

وانسانى انت بعدها

واحضن هواها وضمها

غير كدا ابقى ظلمتها

وانا اختها



بعشق ترابك

بعشقتك ترابك يا بلادي
يا عالية فوق كل اعادي
انا من جدودي لاحفادي
حبك بيجرى فى شراييني

** ** *

أنا م المحلة وبنادي
على سيوة والخارجة الوادي
تسلم ايديكم واياي
تمسح بحب دموع عيني

** ** *

دمياطي اصلي من النوبة
ورشيد دي بلدى المحبوبة

لو ١٠٠ ألم ما هقول توبة

يا مصر حبك يكفيني

** ** *

أسيوط سوهاج الاسماعيلية

نسمة هوا ومعدية

من بورسعيد احلى هدية

لكل وطني بيحميني

** ** *

م المنيا جايلك يا عروسة

ويا سينا م العين محروسة

من طنطا اجيبك بسبوسة

مطروح يا عشقى وسنيني

** ** *

م الجيزة صاحبي وناداني

انا م البحيرة واسواني

يا اسكندرية يا وحشاني

على شط بحرك رسينى

** ** *

والقاهرة يا احلى مدينة

شوارعها تحضن خطاويننا

يا سويس يا اغلى اسامينا

م القلة يا قناوى اسقينى

** ** *

الاقصر بلدنا وامجادنا

ودسوق دى فيها اسيانا

فيومى وف صحبة تاخذنا

عند السواقى تودينا

** ** *

اخر كلامى انا شرقاوى

لو هحكى عن بلدى حكاوى

جايلك يا منصوره تداوى

جرح الزمن وتدفينى



مايا

الله يرحمك يا امايا

ولا عندي في غلاوتك حد

ياربى دا كل منايا

ف الجنة نكون سوا مع بعض

** ** *

وحشنتنى اللمة فى وجودك

ولمسة ايدي لخدودك

يا صابرة وما انكسر عودك

يا حضنى الدافى وقت الجدد

** ** *

ينام الكل الا انتى

يا تاج فوق راسى يا حبيبتى
يا سندی وضهرى فى مصيبتى
وعمرک يوم ما خونتى الوعد

** ** *

ومهما زمانى يكسرنى
نصايحك ليا تحرسنى
ومين غيرك هيرشدنى
بحبك حب فاق الحد

** ** *

ولسه دعاكى صوت بيرن
ومنك حضن وقت ما ازن
وكل دقيقة قلبى يحن
وتنزل دمعة فوق الخد



دمياط بلدنا

دمياط بلدنا ... والفخر ليا
فيها اتولدنا ... صابرة وأبيه
لو مهما روحنا ساكنة فى عينينا
حتى فى جروحنا ... نيلها يداوينا

** ** *

فن الموييليا دا دمياطى
والصيد دا رزق من العاطى
مدد يا سيدى ابو معاطى
الخير على قدوم الواردين

** ** *

بلد الجمال والحلويات

على شط نيلها تقضى ساعات

لو مهما عدى العمر وفات

هتلاقى جوا القلب حنين

** ** *

عند الفنار وف وقت غروب

طاهرة القلوب وأحبة تدوب

وبدمعة تلقى الشمس تغيب

** ** *

جرب وطوف بقى حواريتها

هتشوف وشوش والخير فيها

لو فيك هموم هتزول وتطيب

** ** *

انا م البلدى وبعشقتها

يحكى التاريخ عن عشاقها

لو حد جرب وفارقها

يدوب يومين وارجع ليها

** ** *

دمياط يا ساكنة العين والروح

حبك في قلبي وفين ما بروح

لو كنت حتى ساكن في سطوح

تحسه قصر ما دام فيها



يا رب صبرني

قالوها مات ... قالت ممتش ..
رجع الكلام لسكات ...
انا زرعى طارح مخبش ..
قالوها بس احنا لسه دافنيه ..
قالت والعمر مش بسنيه ..
قالوها جدع يحمى التراب ويصونه
قالت كنت شوفوا الضحكة اللي ف عيونه
هاتولى حبة رمل ...
من سينا واسالوها
من امتى كان القتل ؟
جزا للى بيحموها ..
الحمل على كتفى عدى وزاد ..
وانا برضه مش أيوب
خلاص يا دنيا كفاية عناد ..

وان كنت عاصى قوليلى اتوب ..
منين يا امايا جايلك صبر
ومهما شربتى كاسات من مر
بشوف فى عنيكى ضحكاية
ومن امتى الجراح بتسر؟؟
قالولك مات .. وقولتى ممتش
وحلمك ضاع .. وقولتى مضعش
واقولك خايف بقيت مكسور
تقولى اياك وعيش متخفش...
دموع ما تكفينى ... ولا حزن يحمينى
الاصل هو انتى ...
رافعة لفوق راسك ... ساكنة عيون ناسك
ولا عمر يوم خونتى ...
قالت يا ولدى تعالى . .
انا عشقى اصبح حالة ..
جوه القلوب بالخير ...
مجروحة أه وبكى ..

ولا عمرى يوم هسكى ..
الا لرب سميع و قدير
حزينة ع اللى اندفن ...
وحلمه اصبح كفن ..
ودموعى ملو العين
لفراقه مش قادره
قتلوه ايدين غادرة
ولا عهد بقى ولا دين ..
انتم شايفينه ميت ..
بايديكم تدفنوه ..
ملايكة عليه صلت ..
ونزلوا يودعوه ...
يارب صبرنى ..
على صبر ماله نهاية
ابنى اللى قدرنى ..
بقى ذكرى جوايا ..



ألف آهه

كنت بصرخ ألف آهه ف كل ثانية
واما أجيلك القاك واخذنى لدنيا ثانية

** ** *

دى الحكاية اتعودتى انك بتبتديها
وبايدك انتى تحطى الف نهاية ليها

** ** *

دى حكاية بلون عنيكى بتبتدى
او بنظرة وضحكة منك توعدى
اول ضحية انا ف هواكى واشهدى
مع انى عارفك يوم عنى لازم تبعدى

** ** *

وحكاية تانية بعد هجرك ترجعى
شايفانى بضحك قولتى لازم توجعى
ياما حايلتك وكنتى رافضة تسمعى
واقول لعينى بلاش كفاية تدمعى

** ** *

اصعب كلام ..
اللى مش عارف اكتبه ...
وانا عمرى عدى ..
ولا كان فى بالى احسبه ..

** ** *

طول عمرى عايش ... من غير حبيب
وأحب ليه ؟؟
كل اللى ليه حبيب بيعذبه

** ** *

دا انا لما بكتب للهوى ..
يدوب كنت بكتب كلمتين ...
وياما جراح من غير دوا ..
دوبت اهات المجروحين ...
طب ليه م البداية بقى ..
كانت القلوب بتجربه ...

** ** *

انا فى بعدك وهجرك
عايش جرحك وغدرك
والحزن ليه اخدنى ..
ياريتنى ما عرفت قلبك
ولا كان قلبى حبك
ولا قلبك كان وعدنى

** ** *

سیبلی جرح فی قلبی وروح
لا زمان یداوی بعاد وجروح
تجرحنی تانی ده مش مسموح
ع البعد ربی یصبرنی

** ** *

ابعد کمان روح وانسانی
قلبك لا ملکی ولا مکانی
مسکین یا قلبی ووحدانی
من بعد حبی بیهجرنی



دويتو.....

هو :

أنا اللي كان قلبى

ساكن هنا جنبى

أول ما شاف رمشك

راحله وقام سابنى

** ** *

هى :

يا فرحة منايا وعمرى

ويا شمسى وليلى وقمرى

دا حتى نجوم الليل

فرحانة بشوقى وسهرى

** ** *

دلع طرح وجع وليد زهير

هو :

أنا قلبى بيحكى كلام

عن شوقه وأحلى غرام

دقاته اللي عاشقة عيونك

وعيونى اللي ما بتنام

** ** *

هى :

أه يا قلبى يا روح الروح

من غيرك ما كانت روح

ولا قلبى يا كل حياتى

كان يقدر بسره يبوح

** ** *

هو :

خدى قلبى يا عمرى هدية

وان مت راح يكون بعديا

باقى روحى وقلبى معاكى

يهدوكى دفا وحنية

** ** *

هى :

لو ينفع تاخذنى فى حضنك

اتدفى واكلم قلبك

وأقوله كلام جوايا

من أول وجودى بحبك

** ** *

هو :

بستنا فى يوم ما القاكى

أشوف صوت الحنين جواكى

واحلف لرمش عيونك

عاشق بدوب فى هواكى

** ** *

هى :

لو تقدر تعالى ف حضىنى

وبكل ما فيك اسمعىنى

واوعى تدارى عيونك

عن عيىنى فى يوم توجعنى



أهلى .. أهلى .. أهلى .. أهلى

من ألف وتسعموية وسبعة

دايما نجومك ف السما ساطعة

وبانجازاتك يا نادى القرن

الدنيا كلها شاهدة وسامعة

** ** *

نادى المبادىء من يومك

وهموم بلدنا دى همومك

فوق كل اسم الالهلى اهم

من كل شر الله يصونك

** ** *

فى الثالثة شمال

اجيال واجيال

جمهور ابطال

الاهلى عظيم
وباعلى الصوت
ولا ثانية سكوت
بنحك موت
لعب وتقسيم

** ** *

الاهلى عندى الدنيا بحالها
يعنى الحياة وبكل وضوح
شهد التاريخ بالحق وقالها
اعظم كيان ف الكون بوضوح

** ** *

اهلاوى عنيد
وحقيقة اكيد
الاهلى حديد
جمهوره وراه
تشجيع بضمير
واغانى كتير

الاهلى كبير

وف عشقه حياه

** ** *

الاهلى اخلاق ومبادئ

قبل البطولة مهما تكون

عشان كده الاهلاوى صادق

تلاقيه فى حب النادى مجنون

** ** *

الاهلى كيان

اشهد يا زمان

وف كل اوان

دايما بطولات

وبكل ما فينا

بنحب نادينا

وحاضرنا ماضيها

اجمل حكايات

** ** *

ملوك فى سلة وطائرة ويد
فى كل لعبة دولاب بطولات
فرق نادينا فى وقت الجد
ابطال رجال وكمان آنسات

** ** *

كورال :

شجع يلا بكل ما فيك
وقت الجد ناديك يلاقيك
يلا يا اهلى قلوب حواليك
تدعى يارب النصر يكون

** ** *

فى الثالثة شمال وبأعلى الصوت
تشجيع وهتاف بيهز الكون
لو مهما اتقال بنحك موت
ومعاك الصعب يا اهلى يهون



دلع طرح وجع وليد زهير

فهرس المحتويات

5	الإهداء
6	نورتي كوكبي
8	ارجوك بلاش
10	خايفة أجيلك
13	بعث عمري
15	أسف غلطت
17	يوم القمر
20	بصت عيونه
22	سجن الاهات
24	قلمي
26	أحلامي
27	موج البحر
28	اسمعني يا زمانى
30	اكتب انت النهاية
32	بخاف م الليل
34	قلب خاين
36	قدرك كده

39	مظلوم	وليد زهير
42	حكمت بآيه...؟	
45	ساقية عليك الليل	
48	آخر الحكاية	
49	حبة فراولة	
51	عصفور وساقية وشجرة توت	
53	نهاية حكايتي	
55	أسفة	
57	معلش آسف	
59	عيون خاينة	
62	انا اختها	
64	بعشق ترابك	
67	مايا	
69	دمياط بلدنا	
72	يا رب صبرني	
75	ألف آهه	
79	دويتو	
83	أهلى .. أهلى .. أهلى .. أهلى	